



Broj: 01/2,03/11-05-570/07  
Sarajevo, 30.1.2008.godine

## **Kolegijima oba doma Parlamentarne skupštine BiH**

### **Članovima Delegacije Parlamentarne skupštine BiH u Parlamentarnoj skupštini Vijeća Evrope**

## **Kolegiju Sekretarijata Parlamentarne skupštine BiH**

### **Predmet: Izvještaj s prvog dijela redovnog zasjedanja Parlamentarne skupštine Vijeća Evrope, Strasbourg, od 21. do 25. januara 2008. godine**

U radu prvog dijela redovnog zasjedanja Parlamentarne skupštine Vijeća Evrope za 2008. godinu, održanog od 21. do 25. januara 2008. godine, učestvovala je stalna delegacija Parlamentarne skupštine BiH, u kojoj su bili:

1. Bakir Izetbegović, predsjedavajući Delegacije,
2. Milica Marković, član
3. Azra Hadžiahmetović, član
4. Mladen Ivanić, član
5. Alma Čolo, zamjenik člana
6. Ilija Filipović, zamjenik člana
7. Mirjana Malić, zamjenik člana.

Početak zasjedanja obilježio je izbor novog predsjednika Parlamentarne skupštine Vijeća Evrope. Za novog predsjednika na jednogodišnji mandat izabran je gosp. Lluís Maria de Puig iz Španije (Socijalistička grupa). Osim predsjednika, izabran je i novi sastav Biroa Skupštine za 2008. godinu. Prema sistemu raspodjele mjesta u Birou Skupštine, Bosni i Hercegovini u toku 2008. godine pripada mjesto potpredsjedavajućeg Skupštine, na koje je iz Parlamentarne skupštine BiH izabran gosp. Mladen Ivanić.

Četvrti dio redovnog zasjedanja obilježen je prisustvom i obraćanjima niza značajnih ličnosti:

- predsjednika Gruzije gosp. Mikheila Saakashvilija
- predsjednika Albanije gops. Bamira Topia;
- premijera Slovačke gosp. Roberta Ficoa;
- premijera Mađarske gosp. Ferenc Gyurcsanya;
- ministra za evropske poslove Holandije gosp. Fransa Timmermansa;
- predsjednika Narodne skupštine Alžira gosp. Abdelaziza Ziaria;
- predsjednika UEFA-e gosp. Michela Platinija;

Glavne teme zasjedanja bile su: *Budući status Kosova, Globalno zagrijavanje i ekološke katastrofe, Zaštita okoliša u arktičkom regionu, Crne liste Vijeća sigurnosti UN-a i Evropske unije, Vanjski odnosi Parlamentarne skupštine Vijeća Evrope (Jačanje saradnje sa zemljama Magreba, Situacija u republikama Centralne Azije, Vijeće Evrope i zemlje posmatrač), Proceduralne smjernice o pravima i odgovornosti opozicije u demokratskom parlamentu, Nestanak novorođenčadi u Evropi s ciljem njihovog ilegalnog usvajanja, Potreba*

*za očuvanjem evropskog sportskog modela, Rasprava o Nacrtu dodatnog protokola na Konvenciju o ljudskim pravima i biomedicini u vezi s genetskim testiranjima za potrebe zdravstva, Prekogranična saradnja i Nadzor javnih površina.*

Januarskim zasjedanjem PSVE dominirala je rasprava o budućem statusu Kosova. Stav nadležnog komiteta – Političkog komiteta PSVE jeste da je rješenje statusa Kosova sa svim regionalnim i širim međunarodnim implikacijama od suštinskog značaja za dugoročnu stabilnost Evrope. Ukoliko Vijeće sigurnosti UN-a ne bude moglo pronaći jednoglasno rješenje, ne treba isključiti mogućnost da Kosovo jednostrano proglasi nezavisnost. U tom slučaju, Politički komitet smatra da EU treba nastojati postići jednoglasan stav prema takvom proglašenju.

Učešće u debati o budućem statusu Kosova uzela je i članica bh. delegacije gđa Milica Marković. Svjesna činjenice da je Kosovo politički prioritet za Evropu, gđa Marković naglasila je da Kosovo ne bi smjelo biti uzrok nestabilnosti Balkana i Evrope, kao i da Srbiji ne smije biti uzet njen teritorijalni integritet. Davanje nezavisnosti regiji koja je nekad bila pokrajina bio bi presedan, te se zato postavlja pitanje da li bi bilo pravedno dati nezavisnost jednom narodu u Srbiji, a sutra isto to pravo uskratiti drugim narodima u Evropi, npr. u Španiji ili Bosni i Hercegovini. Na kraju svog izlaganja, gđa Marković pozvala je na poštivanje međunarodnih povelja, uzdržavanje od nametanja rješenja te istakla značaj promoviranja dijaloga i kompromisa u postizanju uzajamno prihvatljivog rješenja. Rezolucija VE o budućem statusu Kosova usvojena je sa 96 glasova "za", 48 "protiv" i 24 "suzdržana" glasa.

Jednako važna tema januarskog zasjedanja bila je i ona o crnim listama Vijeća sigurnosti UN-a i Evropske unije koja je posebno bila usmjerena na pitanje „sastavljanja“ crnih lista, mogućnosti da se osumnjičeni za koje nisu pronađeni nikakvi dokazi „skinu“ sa crne liste, te nepoštivanje osnovnih ljudskih prava lica koja se nalaze na crnoj listi. U tom kontekstu, Skupština smatra nedostojnim prakse UN-a i EU da na crne liste stavljaju ljude samo na osnovu sumnji, bez informiranja tih lica, bez mogućnosti da budu saslušani i bez učešća nekog nepristrasnog tijela. Stav Komiteta za pravna pitanja i ljudska prava je da takve procedure potkopavaju legitimnost ciljanih sankcija u borbi protiv terorizma.

Trećeg dana zasjedanja predsjedavajući Delegacije gosp. Bakir Izetbegović susreo se s novoizabranim predsjednikom Parlamentarne skupštine Vijeća Evrope gosp. Lluïsom Mariom de Puigom i s generalnim sekretarom PSVE gosp. Mateom Sorinasom. Tokom razgovora predsjednik PS Vijeća Evrope De Puig rekao je da će praćenje budućeg razvoja događaja u BiH biti od posebnog značaja, te da će, svjestan institucionalnih kompleksnosti BiH, pružiti svu moguću podršku u svojstvu predsjednika Skupštine. Gospodin Izetbegović istakao je da se situacija u Bosni i Hercegovini polako ali sigurno poboljšava, te je naglasio da je Bosna i Hercegovina naročito interesantna za Evropu kao dokaz da različiti narodi i vjere mogu živjeti zajedno. Tokom susreta generalni sekretar PSVE Mateo Sorinas izrazio je zadovoljstvo zbog konačnog izbora predsjedavajućeg Delegacije čime će biti otklonjene teškoće koje su se pojavljivale u proteklih godinu dana koliko je Delegacija bila bez rukovodstva. Posebno je istakao važnost nedavnog imenovanja gđe Caroline Ravaud za specijalnog predstavnika generalnog sekretara Vijeća Evrope u Bosni i Hercegovini, dodavši da se gđi Ravaud kao vrsnom poznavaoocu prilika u BiH može obratiti za bilo koju vrstu pomoći.

Pripremila: Edina Hrnjić

Odobrio: Bakir Izetbegović

Sektor za međunarodne odnose i protokol

Predsjedavajući Delegacije

*Prilog: Rezolucije PSVE o Kosovu i Crnim listama Vijeća sigurnosti UN-a i EU*

**Kopija: Sekretarima Komisije za vanjske poslove Predstavničkog doma PSBiH i Komisije za vanjsku i trgovinsku politiku, carine, saobraćaj i komunikacije Doma naroda P BiH**